

latiora, postea sensim dilatata, apice singulatim rotundata, subdepressa, nigro-picea, basi dilutiora, creberrime ruguloso - punctata, pubescentia, lineis elevatis tribus, obsoletis. Corpus subtus ferrugineum, nitidum, crebre punctatum, pilosum, thorace subtus, segmentorumque abdominalium margine obscuriore. Pedes breves, tenues, pallide ferruginei, pilosi.

A. D. Comite Ferrari ad describendum benevole communicatum.

22. **Saperda uncinata.**

Gen. Phytoecia. Dejean.

Linear - elongata, nigra, griseo - pubescens, thorace ruditer punctato, longe piloso, simulque pube cinerea in lineam medianam et lateralem condensata adsperso, scutello albido - pubescente, elytris punctatis, segmentorum abdominalium primo atque secundo apice uncinatis.

Long.: $3\frac{1}{3}$ — $4''$. Lat.: $\frac{3}{4}$ — $1''$.

Caput thorace latius, nigrum punctulatum, pube cinereo - albida adspersum, simulque longe pilosum, fronte convexiuscula; oculi magni, nigro - brunnei, profunde emarginati. Antennae vix longitudine corporis, setaceae, nigrae, sub-pilosae. Thorax sub-cylindricus, in medio vix dilatatus, intra basin et apieem leviter constrictus, crebre punctatus, niger, longe pilosus, pubeque cinerea adspersus, in lineam medianam et lateralem, apicem non attingentes, condensata. Scutellum semi-ovale, nigrum, dense albido - pubescens. Elytra thorace fere duplo latiora, humeris elevatis, linearia, postice parum angustiora, apice singulatim rotundata, supra in dorso plana, nigra, anterius pilosa, profunde punctata, pube tenui, cinerea adspersa. Corpus subtus nigrum, cinereo - pubescens, thorace subtus crebre et profunde, pectore abdomineque ra-

rius atque subtilius punctulatis, segmentorum abdominalium primum et secundum in medio apice in uncos producta. Pedes mediocres, nigri, cinereo-pubescentes, femoribus simplicibus.

Videtur marem atque feminam his uncis esse instructos.

Bis lecta a fratre meo Ludovico in loco Brigittenau.

23. **Saperda biguttata. Megerle.**

Gen. Phytoecia. (Dej.) venusta, Fridwaldsky.

Brevior, nigra, pilosa, thoracis linea media, scutello, elytrorum macula apicali, pectoris lateribus, segmentorumque abdominalium marginibus albido - pubescentibus, pedibus testaceis.

Long.: $3\frac{1}{2}''$. Lat.: $1''$.

Caput thorace latius, nigrum, pilosum punctulatum, fronte planiuscula, pube grisea tecta. Oculi nigri, emarginati. Antennae longitudine corporis, setaceae, nigrae, sub-pilosae. Thorax cylindricus, lateribus perparum ampliatus, niger, pilosus, punctatus, linea media albido-pubescente. Scutellum exacte quadratum, albido - pubescens. Elytra thorace duplo latiora, oblonga, postice parum angustiora, convexa, dorso planiuscula, nigra, pilosa, crebre et profunde punctata, ante apicem utrinque guttula albido-pubescente ornata. Corpus subtus nigrum, subnitidum, tenui pubescens, subtilissime coriaceum, pectoris lateribus linea albida longitudinali signatis, segmentorum abdominalium marginibus pube albida annulatis. Pedes omnes flavotestacei.

Semel lecta a D. Ullrich circa Linz.